

Date – 06/07/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. MHIP din champha vawi 52-na chu state chhungah uar taka hman a ni.
2. State Transport Authority (STA) chuan mipui mamawh phuhruk zo tur MizoTaxi app-a inziak lut lirthei a awm theih nan hmalak mek a ni a ti.
3. Ram pathum tlawh tura zinchhuak Prime Minister Narendra Modia chuan vawiin khan Indonesia khawpui Jakarta a thleng.
4. Union Cooperation Minister Amit Shah-a chaun ramchhunga cooperative movement chuan bung thar a kai a ti.

<><><>

MHIP DAY

Vawiin hi MHIP din champha vawi 52-na a ni a, an din champha pual hian MHIP Branch hrang hrang chuan tanpui ngaite tanpui nan leh, a mamawh zawk te tan a luanchhuah nan leh intihhlim na hun an hmang a ni.

MHIP Day pual hian MHIP Gen Hqr chuan thuchhah tichhuakin, Mizoram leh khawvel ram hrang hranga cheng MHIP member-te chibai an buk a, hlim taka Day hmang turin duhsakna an hlan.

Larsap Gen (Rtd) Vijay Kumar Singh chuan hmeichhiate chu nunphung zir tanna, thil tha engkim inhrilha seilen puina leh ram hmakhaw hun thui tak hriltu, chhungkaw tinte innghahna ban pawimawh tak an ni a ti a; hmeichhiate chu chhungkaw tin innghahna an nih thu sawiin MHIP member-te chu Mizoram Hmasawn (Viksit Mizoram) siam turin hmalakna hrang hrangte a hlawhtlin theih nan dinhmun pawimawh tak an luah thu a sawi a ni.

Chief Minister Pu Lalduhoma pawhin thuchah ti chhuakin, MHIP hi hmeichhia leh naupangte kaihruaitu leh tanpuitu tlawmngaipawl lian ber a nih thu a sawi a, MHIP chuan a din tirh ata vawiin thlengin hmalakna tha tak tak a kalpui a, an zarah Mizoram pawhin malsawmna a dawng nasa hle tih a sawi.

Health Minister Pi Lalrinpuii pawhin MHIP chu pawl tangkai leh thawhhlawk tak a nih thu a sawi a, a bik takin Hmeichhiate tan a tangkai em em a, vawiinah ngei pawh tangkai takin ala nung reng thei hi a lawmawm takzet, a ti.

MNF President Pu Zoramthanga chuan MHIP-ten hmeichhe dinhmun chawisanna kawnga an hmalakna chuan tuikhur ral mai nilo, tuipuiral a kai tih a sawi a, ram leh hnam hmelma ruihhlo

dona kawngah te, tu leh fate hnena nunkawng dik inzirtirna kawngah te, Mizo hnam nunphung leh hnam ziarang inzirtirna kawnga an hmalaknate hi a lawmawm tak zet a ni, a ti.

Mizoram Pradesh Congress Committee president Pu Lalthanzara chuan Mizoramin MHIP pawl ropui tak a nei chu a vanneihthlak thu a sawi a, Mizo hmeichhiate tan leh Mizo hnam tan MHIP hi lo vul zual zel sela, Mizo mipuite pawhin a hlutna hre reengin i tawiawm zel ang u, a ti.

BJP Mizoram chuan Hmeichhiate chibai bukin, Mizo hmeichhiate chu chhungkua, khawtlang leh ram dinhmun khaidingtute an ni, an ti a, tunlaiah chuan sorkar hna leh sumdawnna lam thlengin hmeichhia te chuan dinhmun pawimawh tak tak an luah mek a ni a, kohhran leh khawtlang hmasawn nan an thawh hlawk hle a ni an ti.

(Corr: Johnny)

<><><>

LIVESTOCK INSURANCE

National Livestock Mission behchhana Animal Husbandry and Veterinary department leh National Insurance Company (NIC) thawhhona hnuaia Animal Insurance kalpui mekah ran 4,675 ziah luh a ni tawh a; ran thite tan insurance sum cheng nuai 20 sing 3 sang 6 pek a ni tawh.

NIC hotute hnen atanga Akashvani News Aizawl thudawn danin, kumin February ni 10-a tlangzarh tâk Animal Insurance-ah hian tun thla ni 3 thleng khan district 11 atangin ran vulhtute'n an ran vulh lai 4,675 chu insurance an tihsak tawh a; ran insure-te chu Aizawl district-ah tam berin ran 2,457-ah insurance tih tawh niin, ran 522 insurance tih sakna Hnahthial district-in a dawt. Lawngtlai district-ah ran insurance tih tawh hi 41 awmin, a tlem berna district an ni.

Ran insurance hi vawk, bawng, sial, kël leh beram tan tih theih a ni a; tun dinhmunah vawk hi district tinah insurance tih sak awmin, a vaiin vawk 4,651 insure tawh a ni a; Aizawl, Lunglei, Serchhip, Mamit leh Saitual district-ahte bawng 15 insurance tih tawh niin, Lunglei district-ah kel 9 insure tawh a ni bawk.

((VOICE CAST - Insurance hi ran len dan azirin pek tur a ni a; vawkah Rs 7,200 - 24,000 inkar, bâwng leh sialah Rs 14,000 - 48,000 inkar leh, kël leh beramah Rs 1,680 - 5,600 inkar pek theih a ni. Insurance tih tawh rante hi an lo thih palh a, ran vulhtuten kim taka insurance pawisa dilna atana kim taka lehkha pawimawh thil tel ngaite nen insurance an dil a nih chuan NIC lam hian a rang thei ang bera chingfelin ran vulhtute bank account-ah pawisa an pe tur a ni a; NIC hian ni 15 chhunga an chingfel hman lo a nih chuan ran vulhtute hnena sum an pek tur hi 12%-in a pung dawn a ni.)

(Corr: Johnny)

STA

State Transport Authority (STA) chuan MizoTaxi app-a inziak lut lirthei chuan mipui mamawh a phuhruk zawh dawn loh avangin mipui mamawh khawp lirthei a awm theih nan hmalak mek a ni a ti.

STA hian hriattirna tichhuakin, Mizorama mihring phur sumdawnna lirtheia chuang thinte'n sorkar bituk chuan man (approved rate) dik tak an chawi theih nan MizoTaxi app duan a nih thu leh lirthei neitute leh mipuite'n tangkai taka an hman an beisei thu an tarlang a ni.

Tun dinhmunah MizoTaxi app hnuaia inziak lut chin chu two wheeler taxi 624, four wheeler taxi 235 leh auto rickshaw 15 a ni a, hei hian Aizawl khawpui mamawh a phuhru dawn lo, niin STA chuan a sawi a ni.

Kan corr report ngaithla ang.

State Transport Authority chuan MizoTaxi kaltlanga taxi leh autorickshaw hmang duhte chuan an indaih dawn rih lo a, hrethiam hram turin mipui a ngen an ti a, mipui mamawh tur khawp lirthei a awm ngei theih nan a rang lamin hmalak mek zel a ni, an ti a; sorkar thuawiha MizoTaxi app hnuaia lirthei inziak lut zawng zawng chungah an lawm thu an tarlang bawk.

Hetihlai hian lirthei hmanga eizawng pawl pathum-Mizoram Taxi Association (MTA), Aizawl Two Wheeler Taxi Association (ATTA) leh Aizawl District Auto Rickshaw Owners' Association (ADAROA) intelkhawmte erawh chuan MizoTaxi App chu hmang duh loin High Court-ah khin an tum thung a; heng pawl 3-te hian MizoTaxi app an hman duh loh chhan hrang hrang zingah rate ennawn hmasak an duh thu te, registration fee awm lo se tih leh app hmangtu mipuiten chhiah za a 6 an chawi tur te a tel a, sorkar hnenah pawh an thlen tawh a ni.

(Johnny CORR)

<><><>

BJP

Dr. Shyama Prasad Mukherjee piancham vawi 125-na pualin vawiin khan BJP Mizoram State Office, Mipui Rûn, Upper Republic-ah lawm a ni a, MDC & State General Secretary Pu Delson Notlia-an he hun hi a hmanpui a ni.

Pu Delson Notlia chuan Dr. Shyama Prasad Mukherjee chu India ram History-ah a pawimawh hle a, Kum 33 a nihin University of Calcutta ah Vice Chancellor a ni a, Vice Chancellor ni thei naupang ber a ni hial a ti a, Politics lamah pawh India ram inrelbawlina ah, Congress Party Sorkar Pu Nehru hun laiin, Union Minister a ni a, Industry Minister hmasa ber a ni bawk a, tih hlawhtlin a tum chu; India ram a resource neih zawng zawngte chu, Sorkar leh private sector-te nen thawk ho a, intodelh tur a ni tih a ni a, Chu Industrial Policy-ah chuan sector pawimawh pali; Defence (Ram himna), Atomic Energy, Railways, Air Services te a ni a, Kum 1948 ah Industrial Finance Corporation (IFCI) a din a, chu chu India ram Independent a hmuh hnua Development Financial Institution hmasa ber atana duan a ni a, chumi kaltlanga Industry ropui tak tak din mai bakah Micro, Small and Medium Enterprises, Cottage Industry, Handloom leh Textile Sector-te a huam a, vawiin thlengin, a vision hi India ram a la chhawr hle a ni," a ti.

Pu Delson Notlia chuan Dr. Mukherjee hi a Minister nih chhung khan sawisel kaina engmah a nei lova, Opposition Party-te thleng pawha sawisel kai lo a ni te kha a ropui hle a ti a, BJP hian India ram hmangaihna atangin rawng a bawl thin avangin Mizoram thlengin tun hmaa State ensan ang hial ni thin pawh Development tam tak a luanglût thei ta a ti a. Development nasa leh zuala hai luh zel theih nan leh Central-in a rin ngam turin BJP hi thawhpui thiam a tha hle a ni, a ti bawk.

(Hruaia Ptc)



AGRI MINISTER

Agriculture & Farmers' Welfare Minister leh Mizoram Agricultural Marketing Board Chairman ni bawk Pu PC Vanlalruata chuan Tuirial Airfield-ah Sawhthing leh thlai dang dahthatna leh sawngbawlna hmun tur vawiin khan a tlawh a.

Tuirial-ah hian sawhthing dahna atan Godown leh a sawngbawlna tur processing unit te bun a nih theihnan chak takin sawrkar chuan hma a lak mek a. Tunah hian a panna tur bypass road siamna atan pawisa Vaibelchhe 5 chuang dah a ni tawh a ni. Chief Minister duhdan angin sawhthing tharchhuah leh hun hmaa peihfel hman tura hmalak mek a ni.

(DIPR)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM TOUR

Ram pathum tlawh tura zinchhuak Prime Minister Narendra Modia chuan vawiin khan Indonesia khawpui Jakarta a thleng a. Jakarta Airport ah Indonesian President Prabowo Subianto chuan a lo hmuak a. Tun tum hi Prime Minister Modia'n Indonesia a tlawh vawi lina tur a ni a. Kum 2018 a Comprehensive Strategic Partnership an neih hnua a zin leh hmasak ber a ni bawk. A cham chhungin Pu Modia hian Indonesia President nen inkawmin ram pahnih thawhdunna hrang hrangte an sawidun ang.

Indonesia a tlawh zawhah hian Australia ah tun thla ni 8 atanga ni 10 thleng a cham leh ang a. Hemi hnu hian New Zealand a pan leh ang.

(Newsonair)



UNION COOPERATION MINISTER

Union Cooperation Minister Amit Shah-a chaun ramchhunga cooperative movement chuan bung thar a kai a ti. Vawiina Union Ministry of Cooperation din cham vawi 5 na lawmnaah he thu hi sawiin Pu Shah-a chuan insiamthatna, digitisation leh hnathawk insiamthatna avangin dinhmun thar an kai a ti a. Ramchhung mipui maktaduai chaungte nun kum nga chhunga an thlak danglam avangin Union Ministry of Cooperation chungah lawmthu a sawi a ni..

(Newsonair)

